

畿輔通志卷一百五十三

略一百八 金石十六 定州下 曲陽 深澤

曲陽縣

漢

恆山下廟碑

澠水又東右會長星溝溝在上曲陽縣西北長星渚水亂流東徑恆山下廟北漢末喪亂山道不通此舊有下階神殿中世以來歲書法族焉晉魏改有東西二廟廟前有碑闕壇場相列焉

水經注

謹案金石考載入北魏蓋據水經注有晉魏改一言遂定爲元魏所立未究上文尙有漢末歲書法族於此之語也顧炎武北嶽辨引漢書云常山之祠於上曲陽應

邵風俗通云廟在中山上曲陽縣後漢書章帝元和三年春二月戊辰幸中山遣使者祠北嶽於上曲陽郡國志中山國上曲陽故屬常山恆山在西北則其來舊矣水經注乃謂此爲恆山下廟漢末喪亂山道不通而祭之於此則不知班氏已先言之乃孝宣之詔太常非漢末也據此則上曲陽之有廟在西漢已然而此碑之立不知爲何時漢人立祠祀神刻石頌德報貺者不一而足如三公山則有三公山祀三公山三公山神君三碑郎山則有郎山君觸鋒將軍太白君三碑之類是也水經注旣云有漢末下階神殿而顧炎武又厯考兩漢祀典則此碑爲漢時所立無疑特不能定其年月耳旣不敢承孫星衍之訛列入北魏而漢朝祠祀已非一次隨

時皆可立石頌德又不敢與光和四年之恆山碑混而
爲一故謹錄水經注之文載諸首篇爲曲陽金石之冠
北嶽恆山碑

右碑文字殘滅尤甚莫詳其所載何事第其隱隱可見者
曰光和四年以此知爲漢碑耳其文斷續不可次序蓋多
言珪幣牲酒黍稷豐穰等事似是禱賽之文其後有二人
姓名偶可見云南陽冠軍馮巡字季祖甘陵夏方字伯陽
其餘則莫可考矣

集古錄
跋尾

隸書不著書撰人氏文字磨滅不可悉考有稱光和四年
元氏左尉上郡瑋者其意若瑋被選舉而立此銘以報神

貺

集古
錄目

在曲陽

金石林
時地考

見天下金石志云文字磨滅惟光和四年等字隱隱可見

漢碑無疑或以爲蔡有鄰書者非

京畿金石考

謹案金石錄云卽三公山碑漢隸字原隸辨亦云然蓋以碑中人名及年月偶同遂以爲歐氏所見之誤耳漢朝崇尚祠祀凡名山大瀆皆列入祀典而守土者報賽祈禳胥勒石誌美如西嶽之華山廟碑廟銘中嶽之太室少室降而至於郎山太白三公無極封龍山白石諸山神祠莫不有碑銘頌辭一而再再而三豈有恆山列在五嶽而反闕如者水經注云上曲陽有碑闕壇場卽此可爲漢時碑刻不僅一石之證矧三公無極皆立之光和四年而此碑中所列名如南陽馮巡上郡樊瑋二人旣一見於三公山碑再見於無極山神廟碑三見於

白石神君碑其時同其人亦同金石錄豈未加詳考而顧執此纖芥之據遂證歐氏之謬其謬不更甚耶又案郡國志中山國上曲陽故屬常山則馮巡旣爲常山相恆嶽或卽其境內之山元氏諸山皆爲請之太常求牲食立石頌德而恆山列於嶽鎮反無所記亦斷無是理今據集古錄仍列之曲陽而三公山碑仍錄趙氏及諸家之跋載入元氏以分畛域

晉

北嶽祠堂頌

泰始六年立

金石錄目

北魏

恆山銘

太平眞君四年春正月庚午幸中山二月丙子車駕至於

恆山之陽詔有司刊石勒銘

魏書世祖本紀

北齊

江阿歡造觀音象記

正書天保六年六月二十五日在城內大寺

金石分城編

造珉象題名

天保七年立石府城內奉恩寺二門上

寶刻叢編

謹案金石考及碑目皆列在曲陽而寶刻叢編云在府

城殆宋中山府曾治曲陽耶

尼法元等造思維象記

正書今爲正定太守沈濤所藏武平四年五月

金石分城編

正書武平四年五月十七日直隸曲陽

續寰宇訪碑錄

魏定州刺史邸珍碑

邸珍碑武平五年二月立

金石錄目

北齊邸珍碑武平五年

金石略

八分書並額在曲陽城南山中俗呼王子墳

金石分域編

碑在直隸定州曲陽縣南關外三里王子墳東魏孝靜帝

天平元年甲寅十月正書隸額案此碑通志金石略題曰

北齊邸珍碑武平五年自後金石家俱宗其說屬之北齊

考北齊書亦列入酷吏傳北史同之若不見此碑亦俱以

爲北齊人矣今此碑現存直隸定州所屬之曲陽縣城南

距城二里許俗呼王子墳光緒辛巳暮春三月余過曲陽

親至其地摩挲碑石雖多剝蝕而碑額完好無恙題曰魏

故侍中散騎常侍定州刺史司空邸公之碑書法遒勁極

類鄭文公道昭筆意爰亟命工搨歸陰及左側已漫漶不可讀而碑右側有以天平元年十月二十七日春秋四十六力疾薨於王事云云天平爲東魏孝靜帝首次紀元閔元象興和武定而齊始受禪中隔十六年武平爲北齊後主紀元武平五年上距天平元年閔四十一年抑何遲之又久而始立石耶今碑中無立碑年月不知鄭夾漈氏何所見而云然考北齊書神武紀天保初追崇爲獻武帝廟號太祖天統元年改諡神武皇帝廟號高祖天統亦係北齊後主紀元閔五年而改元武平今碑文有曰大齊神武皇帝則此碑當立於天統以後夾漈氏以爲武平五年立或必有據而邱珍之卒實在東魏孝靜天平元年其爲魏人無疑故仍繫之於魏緣唐歐陽信本書隋皇甫元憲碑

書撰人均係唐人而皇甫元憲則係隋人王氏金石萃編
列之隋代今亦援此例也又碑中有封神鳥縣開國侯考
魏書地形志及隋書地里志俱無此縣杜佑通典姑臧郡
有神鳥縣云卽漢鸞鳥縣漢書地里志及郡國志鸞鳥縣
屬武郡錢氏埵曰鸞鳥縣在今甘肅涼州府武威縣南考
晉書張軌傳中州民避難來者日月相繼分武威置武興
郡後魏之武興郡在今陝西略陽縣與此有別以居之元和郡縣志云本漢鸞
鳥縣張天錫改今名案此張氏所置之武興郡在今甘肅
武威縣西北七十里則神鳥縣故城當亦在今甘肅武威
縣西北七十里晉書張軌傳謝艾軍次神鳥殆卽此城宋
樂史云後魏改爲神鳥今此碑適與之合是可補魏志之

缺求是齋
藏碑目

魏定州刺史邸珍碑

又一碑正書文並同漫漶已甚僅下載可辨字體不類北朝人迹疑後人因原碑之泐重刊此石乃泐更甚於原碑

金石分

域編

隋

恆嶽寺舍利塔碑

隸書不著書撰人名氏文帝仁壽元年建舍利塔於恆嶽寺詔吏民行道七日人施十錢又寫帝像於寺中大業元年長史張果等立碑

集古錄目

定州

金石略

唐

鎮嶽靈仙寺碑

薛收撰正書無姓名貞觀元年立

金石錄目

恆嶽嶺路銘

深澤處士張克雋撰恆嶽嶺處士書高宗調露中用兵於突厥恆州長史披山刊木構橋梁以通運路路由北嶽故以

嶽嶺爲名

集古錄目

調露二年二月立眞字

寶刻類編

調露二年張克雋撰並書曲陽

畿輔碑目

謹案碑目作儔疑誤

北嶽府君碑

陳懷志此碑在李北海雲麾之下法華之上蓋以其筋骨

有餘而丰度微濫爾

蒼潤軒帖跋

碑連額高九尺六寸廣四尺九寸七分二十九行行四十

七字行書額正書在曲陽縣北嶽廟案開元禮諸嶽鎮海
瀆每年一祭各以五郊迎氣日祭之前一日嶽令瀆令清
埽內外贊禮者設初獻位於壇東南亞獻終獻於初獻南
少退祭日行事唐書禮儀志北嶽恆山祭於定州文獻通
考其牲皆用太牢祀官以當界都督刺史充此碑碑陰所
紀祭日皆以立冬祭官皆定州守土者姓名分列三獻與
諸書合也文述先天二年清苑人魏名確至嶽廟前見二
人云是五嶽大使發兵六十萬衆爲國討賊九月三日俱
來此山大爲歡會州將聞奏敕遣上宮及內謁者齎神衣
禮物以赴會期凡厥寮案共陪享祭云云事涉神異史志
皆所不載考舊唐書元宗紀先天二年七月三日竇懷貞
等與太平公主同謀期以其月四日以羽林軍作亂上密

知之皆執諸人斬之碑所謂爲國討賊者殆指此事也碑
文韋虛心撰陳懷志書唐書韋湊傳云虛心字無逸景龍
中遷御史中丞歷荆潞揚三大都督府長史入爲工部尙
書東京留守累封南皮郡子此碑開元九年立而猶題御
史中丞則其官中丞歷十餘年之久矣陳懷志史無傳其
官邠王府參軍唐書章懷太子賢傳次子守禮嗣王唐隆
元年進封邠王懷志爲其府中參軍碑陰碑側皆元和以
後歷次祀官題記後有宋大中祥符題記二段又案北嶽
恆山在五嶽中最爲橫亘縣長故起自山西之渾源州迄
於直隸定州之曲陽皆有恆山之名禹貢太行恆山至於
碣石入於海孔安國注二山連延至碣石也是恆山與太
行皆連延也管子云其山北臨代南俯趙東接河漢之間

胡三省通鑑注恆山挺峙於冀州之中爲東西屏蔽巖穴
高深道路險阻出奇者所必由也山西通志云北嶽恆山
在渾源州城南二十里高十里周百三十里由恆山南行
爲太行王屋西南盡於河東行爲紫荆居庸而東北盡於
海

畿輔通志云恆山在定州曲陽縣西北一百四十里亘保定府
西境及山西大同府東境蓋曲陽之西北近渾源之東南
壤地不甚相遠也然稽之元和郡縣志及兩唐書地理志
惟於河北道定州曲陽縣注有恆嶽有嶽祠其今之渾源
州在唐未謂之渾源縣在隋爲平寇縣地在兩漢魏晉爲
崞縣地後魏改名爲崞山縣後屬繁峙縣

見大清一統志表考元

和志及兩唐書繁峙崞縣並屬河東道代州而無渾源之

名疑是後唐所置兩五代史又不詳

且不注恆山在其縣蓋在唐時專以

恆山屬之曲陽也其渾源之立廟始於前明馬文升之疏
本朝遂著爲定制文升疏云恆山北嶽在今大同府渾源州歷
秦漢隋唐俱於山所致祭五代河北失據宋承石晉割賂
之後以白溝爲界遂祭恆山於真定府曲陽縣歷元迄本
朝因循未曾釐正文皇帝遷都北平真定反在都南當時
禮官不能建明尙循舊陋夫周禮曰恆山爲并州鎮在正
北一統志曰恆山在渾源州南二十里又渾源廟址猶存
故老傳說的的不虛乞行禮部再加詳考於渾源州恆山
廟舊址增修如制云云顧甯人辨之曰古之帝王其立五
嶽之祭不必皆於山之巔其祭四瀆不必皆於水之源也
恆山縣亘幾三百里而曲陽之邑於平地其去山趾又一

百四十里馬文升所以有改祀之請也考之虞書十有一月朔巡狩至於北嶽周禮并州其山鎮曰恒爾雅恒山爲北嶽注並指爲上曲陽三代以上雖無其迹而史記云常山王有罪遷天子封其弟於真定以續先王祀而以常山爲郡然後五嶽皆在天子之邦漢書云常山之祠於上曲陽應邵風俗通云廟在中山上曲陽縣後漢書章帝元和三年春二月戊辰幸中山遣使者祠北嶽於上曲陽郡國志中山國上曲陽故屬常山恒山在西北則其來舊矣水經注乃謂此爲恒山下廟漢末喪亂山道不通而祭之於此則不知班氏已先言之乃孝宣之詔太常非漢末也魏書明元帝泰常四年秋八月辛未東巡遣使祭恒嶽太武帝太延元年冬十一月丙子幸鄴十二月癸卯遣使者以

太牢祀北嶽太平眞君四年春正月庚午至中山二月丙
子車駕至於恒山之陽詔有司刊石勒銘十一年冬十一
月南征徑恒山祀以太牢文成帝和平元年春正月幸中
山過恒嶽禮其神而反明年南巡過石門遣使者用玉璧
牲牢禮恒嶽夫魏都平城在恒山之北而必南祭於曲陽
遵古先之命祀而不變者猶之周都豐鎬漢都長安而東
祭於華山仍謂之西嶽也故吳寬以帝王之都邑無常而
五嶽有定厯代之制改都而不改嶽太史公所謂秦稱帝
都咸陽而五嶽四瀆皆并在東方者也隋書大業四年秋
八月辛酉帝親祀恒嶽唐書定州曲陽縣元和十五年更
恒嶽曰鎮嶽有嶽祠又言張嘉貞爲定州刺史於恒嶽廟
中立頌予嘗親至其廟則嘉貞碑故在又有唐鄭子春韋